

Obraćanje visokog predstavnika na Londonskoj konferenciji o partnerstvu u borbi protiv organizovanog kriminala

Visoki predstavnik Paddy Ashdown se danas obratio učesnicima Londonske konferencije o partnerstvu u borbi protiv organizovanog kriminala. Cilj konferencije je bolja koordinacija aktivnosti u sklopu regionalnih i međunarodnih inicijativa za borbu protiv kriminala, kao i postizanje stvarnog kratkoročnog i srednjeročnog napretka u borbi protiv organizovanog kriminala. Konferencija je okupila preko 300 ministara iz zemalja jugoistočne Evrope, susjednih država i Evropske Unije i zvaničnika međunarodnih organizacija.

Visoki predstavnik je konstatovao da je organizovani kriminal na Balkanu problem cijele Evropu i da zbog toga jačanje vladavine zakona mora biti prioritetan zadatak u regionu. On je rekao da su faktori koji doprinose širenju organizovanog kriminala isti u svim dijelovima jugoistočne Evrope: strateška lokacija na evropskoj granici sa Azijom, nestabilni i fragmentirani politički i pravni sistemi u kojim organizovani kriminal eksploatiše “jedinostveni kriminalni prostor” koji nije ograničen ekonomskim, političkim, etničkim niti geografskim granicama, kao i nasljeđe pogubnih sukoba s početka devedestih godina.

Što se tiče viđenja razloga i posljedica organizovanog kriminala iz ugla BiH, visoki predstavnik je rekao da “organizovani kriminal iskorištava i uživa zaštitu slabe i fragmentirane države, institucija i dužnosnika kompromitovanih

korupcijom i široko rasprostranjene sive ekonomije koja sakriva stvarne dimenzije kriminalnih aktivnosti.”

Da bi se uspješno uhvatilo u koštac sa ovim problemom, visoki predstavnik je zatražio da “napori od strane policijskih organa budu jednako organizovani, koherentni i međunarodni po svom karakteru kao i kriminalne mreže protiv kojih se borimo. To, s jedne strane, znači stvaranje snažnih sistema saradnje između organa vlasti država jugoistočne Evrope, kao i saradnje sa državama u susjednim regionima, uključujući Evropsku Uniju. To znači da se moraju postići dogovori koji će omogućiti jednostavnu i brzu saradnju između policijskih i sudskih organa različitih zemalja na način da granice između zemalja prestanu biti utočišta za lopove.”

Visoki predstavnik je insistirao na stavu da “u svakoj zemlji reforme sistema za provođenje krivičnih zakona predstavljaju ključna sredstva za rad policije, graničnih službenika, istražnih organa, tužilaca, sudija i djelatnika kazneno-popravnih institucija. Neophodno je donošenje modernih propisa u oblastima kao što je zaštita svjedoka, a za sve ove aktivnosti je potrebna međunarodna pomoć.” Visoki predstavnik je rekao da se ovi prioriteti moraju odraziti i u donatorskim prioritetima i budžetima države BiH i njenih entiteta.

Govoreći o optuženom za ratne zločine Radovanu Karadžiću, visoki predstavnik je rekao da je “Radovan Karadžić otvorio vrata u Bosni i Hercegovini za organizovani kriminal, eksploatisao ga, te postao simbolom bezakonja. Ništa drugo ne bi moglo više iskazati odlučnost BiH u borbi protiv organizovanog kriminala nego njegovo hapšenje.”